

Ceremonia solemne na monumento di Guera

## Cu dos minuut di silencio Aruba a recorda esnan cu a muri den di dos Guera Mundial



**ORANJESTAD-** Dia 4 di mei 2016 nos ta conmemora cu 71 aña pasa a yega un fin na e cueldadnan di Segunda Guera Mundial. Miyones di hende a sacrifica y a perde nan bida pa awe nos por biba den libertad. E libertad aki ta hopi fragil, si mira con den hopi pais na mundo ainda tin guera, tin genocida y barbaridadnan ta tuma luga. Den henter Reino e dia aki ta wordo recorda cu bunita ceremonia y dos minuut di silencio na honor di tur a lucha y muri pa nos libertad.

Na Aruba tabata tin un ceremonia solemne dilanti e monumento di guera, na unda soldanan di Savaneta Kamp a forma un guardia ceremonial. Un ceremonia cu a wordo organisa pa e fundacion Camarada y cu a cuminsa cu un marcha di silencio. Gobernador di Aruba sr. F. Refunjol, Vice Presidente di Parlamento Chris Dammers, Minister Sevinger, representando Prome Minister kende ta den exterior, Comandante di Marinierskazerne Ten Hove, miembronan di Parlamento, representantenan di Hulanda, veteranonan, invitado y hopi interesado tabata presente na e conmemoracion formal aki.

Aalmoezenier di Marinierskazerne a hiba un bunita discurso. El a enfatisa cu loke a pasa den di dos Guera Mundial nunca no por wordo lubida, p'esey ta asina importante pa keda recorda e dia aki y pasa over loke a sosode

e tempo pa e siguiente generacion. 'De verhalen mogen niet vergeten worden'. Na final di su bunita mensahe el a resa hunto cu tur presente 'Nos Tata' na Papiamentu. Minister Sevinger tambe a para keto na e atrocidadnan cometi den e periodo ey. Nos di Aruba tambe a sinti su efecto den hopi situacion. E efecto di mas teribel tabata e morto heroico di Boy Ecury, un hoben Arubiano di apenas 22 aña cu a bay studia na Hulanda y a regresa su pais den un caha di morto. "Un dolor inmenso pa su famia, pa tur cu a conoce y pa henter Aruba cu a perde un heroe y mundo a perde un yiu balente. Aruba a yora su yiu", Sevinger a bisa.

Tambe e mandatario a pone hopi enfasis riba e libertad cu nos tin awe cu pa nos ta algo logico, pero pa hopi otro rond mundo no. Nos

por expresa nos opinion sin wordo tortura, poni preso, maltrata of hasta mata. Un libertad cu mester wordo aprecia semper. Un libertad cu nos tin danki na hopi cu a muri pa nos tin'e. "Laga nos nunca, nunca lubida esaki. Poder, forza y inteligencia t'ey pa sirbi otro y no destrui otro", Sevinger a bisa. E hoben Christopher a recita un bunita poesia.

Despues a sigui cu ponemento di krans pa Gobernador, Parlamento, Gobierno di Aruba, veteranonan, descendiente di esnan cu a muri aki durante guera, VNO, Comandante di Marinierskazerne y a pone un calita cu 71 flor blanco recordando cu 71 aña pasa e Guera cruel aki a yega su fin. Na final tur presente a pasa dilanti pa rindi honor na esnan cu a perde nan bida den e periodo scur ey. □

